

CAMINI IN L'ALP DI SASS

Camini in l'alp di sass.

Sentúr da la cunchiglia che ripét
l'unda dal mar.

Dònn da i dòss da Genur
d'Àlbiu e d'Uriment,
alzan i brasc ilüminaa
da la rama da l'uliva che fa föch.

Ciar d'aqua che rebatt:

aqua reliquia ai labar di funtan,
che tòchi adasi cui dó man, che pòrti
adasì in sü la ment.

MATINA DI VIGÍLI

Matina di vigili che vèrt l'anta
ai fiur in trasparenza da la nev,
a fiadan sü da sótt fufurescent,
a lassan sü l'imprunta di culúr.

Manzett, mundín, manzöö,
zanévar in sül pass da la viscarda,
túrei che sa cuntemplan
in la crösa madreperla di sarizz;
e la pernís che vóla bass, rasent
i sass,
tramèzz a la drusèra che sa rizza.

Adèss la sa diseda la serena
mimitizada in l'ávas di delitt.

STELA DA LIN

Stela dal lin che dà l'azür
ai fazulitt. Smeralda la ricama
non ti scordar di me,
e viulett da Parma.

Avicc che saman
al gáròv da la züca
dulza dal còll lungh.

I FIUR CHE TA PIASEVAN

A ta purtavat la gala,
róssa dal róss bargili di galitt.

A ta lassavat giò sü la risciada
la grana sincera dal carlun.

Fiurirann, quest'ann, i fiur che ta piasevan,
la züca bressanèla di fiur giald
setada sü la tòla di pulee?

LA MADÒNA DA MENDRÍS

Vestida in vèsta negra,
Madòna da Mendrís
che pòrta ul lütu al Figlio
cun sètt pügnai a rosa.

Urganz che vela la ferida !
Unguent che còla giò di Crus !

IN GITA AL TIRALOCC

Madòna da Varés,
in pee sül car di böö,
a la Campagna Adorna.

La benediss i ábat,
la pòrta l'aqua al fee.

In gita al tiralöcc da Mòrbi d'sótt,
l'incuntra la Madòna,
capa dal Distrett.

Sa fann i curtesii.
Sa scambian i medái.
Sa parlan sù dal temp.

— La póma restelina
mò l'è fö!

LUS DA CIEL

Madòna sü la paia
arent a la nuvèla.

Nuvèll languid che miran
i segn di prufezii,
e buatei,
che mövan a careza,
la cua
sü la föia dal presepi.

Fiaa, mò, da la cumeta.
Lüs da ciel da tecc a tecc.

L'È NASSUU !

Armònica a fin d'ann
in vista di stèll növ.

SU LA BÓLA DAL LIVÈLL

Al sfratazza,
dre via i grund.

Al sa rimira.

La cazzöla l'è d'argent,
ör lüsent ul fil a piumb;
sü la bóla dal livèll,
nass la stela di remagi.

Fiur fiurii sü l'andadura,
batezaa cun l'aqua santa
di Maister drizz süi tecc,
mi giügavi cumè ti
— Bernasconi Clementín —
cunt la mòlta e l sfratazzin.

Mò che gela la calcina...